

20 November 2024

1700 Hrs

ایوننگ گو جری نیوز بلیٹن مورخہ 20 نومبر 2024

یوہ آکا شوانی جموں ہے محبوب سلطانی تے اظہر حسین تیں خبر سُنو۔ پہلاں خاص خاص خبر۔

- *1۔ وزیر اعظم نریندر مو دی اج شام جا رج ٹاؤن مانہ گیانا غا صدر ڈاکٹر محمد عرفان علی سنگ گل بات کریں گا۔
- *2۔ وزیر دفاع راج ناتھ سنگھ آسیان وزرائے دفاع غی میٹنگ پلس مانہ شرکت واسطے لاؤس غا 3 روزہ دورہ روانہ ہوا ہیں۔
- *3۔ ڈپٹی کمشنر کٹھوعہ نے کاشتکار برادری ور زور پایو کہ وے مجموعی ذرعی پروگرام غے تحت موٹا اناج غی کاشت اور ذرعی آلات غی خریداری واسطے محکمہ زراعت غی طرفوں پیش کردہ سبسڈی توں فائدو حاصل کریں۔
- *4۔ جموں کشمیر حکومت نے صارفین نانہ چھتاں ور سولر پنل نانہ نصب کرن واسطے راغب کیو ہے۔

خبراں غی تفصیل نال پہلاں محبوب سلطانی۔

PM Guyana

وزیر اعظم نریندر مو دی اج شام نانہ جا رج گاؤن مانہ گیانا غا صدر محمد عرفان علی سنگ گل بات کریں گا۔ تے منیو جا رہیو ہے جے اس دوران بکھ بکھ سمجھوتاں ور دستخط وی کیا جائیں گا۔ وزیر اعظم اج سویرے گیانا پُجیا تھا۔ جت اُن غو استقبال صدر محمد عرفان علی تے آدھ درجن توں متا کا بینہ غا وزیراں نے کیو تھو۔ واضع رہ جے جناب مو دی غو یوہ دور 3 تہاڑاں ور مشتمل ہے۔ جناب مو دی دوجا کیری کوم بھارت اجلاس مانہ وی شرکت کریں گا تے نال ہی نال وے کیری کوم ممبر ملکاں غا رہنماں سنگ گل بات وی کریں گا تانجے خطہ سنگ بھارت غی دوستی نانہ مزید مضبوط بنایو جا سکے۔ وزیر اعظم پلک گیانا غی پارلیمنٹ سنگ خطاب کریں گا تے اس غے نال نال وے بھارتی تارکین وطن غا اجتماع سنگ وی خطاب کریں گا۔ قابل ذکر ہے جے پچھلے سال جنوری غا مہینہ مانہ پرواسی بھارتیہ دیوس ور صدر محمد عرفان علی مہمان ذی وقار تھا۔ بھارت صحت، رابطہ، قابل تجدید توانائی تے پانی غا شعبہ مانہ گیانا سنگ لما عرصہ توں ترقیاتی شراکت دار ہے۔ اس دورہ غے دوران گیانا غی طرفوں وزیر اعظم مو دی نانہ اپنا سب توں بڑا اعزاز سنگ وی نوازیو جائے گا۔

Rajnath Singh LAOS Visit

وزیر دفاع راجناتھ سنگھ اج لاؤس مُلک غا 3 روزہ دورہ واسطے روانہ ہو گیا ہیں جت وے آسیان غی دفاع بارے وزراء غی میٹنگ پلس مانہ شرکت کریں گا۔ اس میٹنگ غے دوران جناب سنگھ علاقائی تے بین القوامی حفاظتی معاملات بارے فورم سنگ وی خطاب کریں گا۔ آسیان مُلکاں غی دفاع بارے وزراء غی میٹنگ آسیان ممبر ملکاں جن مانہ برونئی، کمبوڈیا، انڈونیشیا، فلپین، میانمار، ملیشیا، لاؤس، ویت نام، تھائی لینڈ، سنگاپور تے اس غا 8 مذاکراتی ساتھی جن مانہ بھارت، چین، امریکہ، روس، جاپان تے جنوبی کوریا شامل ہیں واسطے اک پلیٹ فارم مہیا کراوے۔ یاہ میٹنگ ہر سال آدیان ممبر ملکاں تے دوجا مُلکاں بشکا

ر تعاون نانہہ مزید بدھان ور مرکوز رہ۔ وزیر دفاع اسٹریلیا، چین، جاپان، لاؤس، ملیشیا، نیوزی لینڈ، فلپین، جنوبی کوریا تے امریکہ غی طرفوں شرکت کرن آلا ہم منصبان سنگ دو طرفہ معاملات ور گل بات وی کر سکیں۔ تا نجے انہاں ملکاں سنگ دفاعی تعاون نانہہ مزید مضبوط بنایو جا سکے۔

CM H&P

وزیر اعلیٰ عمر عبداللہ نے پچھلے تہارے سول سیکریٹریٹ جموں مانہہ مہمان نوازی تے پروٹوکول محکمہ غی اک میٹنگ غی صدارت کی۔ اس دوران انہاں نے محکمہ نانہہ ہدایت جا ری کرتاں و اں کہیو جے جموں کشمیر غے اندر تے باہر موجود محکمہ غا اثاثاں غا بہتر استعمال ور توجہ مرکوز کرن با رے کہیو۔ اس میٹنگ غے دوران کمشنر سیکریٹری رشمی سنگھ نے محکمہ غا اثاثاں با رے تفصیلی جانکا ری فراہم کی، جن مانہہ جموں کشمیر توں باہر بشمول دہلی، چندی گڑھ، امرتسر تے ممبئی مانہہ موجود جائیداد وی شامل ہے۔ وزیر اعلیٰ نے چنکیہ پوری، 5 پرتھوی راج روڈ تے راجا جی مارگ دہلی سمیت نمایاں جائیداد غا کم کاج غو جائزو لیو۔ انہاں نے جائیداد غو پورو استعمال کرن ور زور پایو۔ جناب عمر عبداللہ نے پہلگام، گلبرگ، سرینگر، اڈھم پور تے جموں مانہہ موجود جائیداد ور توجہ مرکوز کرن با رے وی کہیو۔ انہاں نے شراکت داری جگہاں ور نواں اثاثاں نانہہ تیار کرن با رے وی کہیو تا نجے مستقبل غی ضرورت نانہہ پورو کرن غے نال نال مالیت مانہہ وی اضافو کیو جا سکے۔

Heritage Walk

خوراک، عوامی تقسیم کا ری تے امور صارفین، ٹرانسپورٹ، نوجوان خدمات اور کھیڈ غا وزیر ستیش شرما نے پچھلے تہارے کلا کیندر جموں مانہہ روایتی واک نانہہ جھنڈی دس غے روانہ کیو۔ اس تیں علا وہ انہاں نے اک تاریخی نمائش غو وی افتتاح کیو۔ اس روایتی واک غو اہتمام محکمہ اثار قدیمہ، عجائب کھر تے جموں اکیڈمی برائے فن ثقافت و لسانیات تے محکمہ سکولی تعلیم غا اشتراک سنگ کیو۔ بکھ بکھ اسکولاں غا طلباء نے اس تقریب مانہہ شرکت کی۔ اس موقعہ ور بولتاں واں وزیر موصوف نے کہیو جے عالمی روایتی ہفتو اک عالمی تقریب ہے جہیڑی ثقافتی تے تاریخی ورثہ نانہہ محفوظ رکھن تے فروغ دین واسطے مانیو جائے۔ انہاں نے کہیو جے اس ہفتہ غو اہم مقصد نوی نسل مانہہ اپنا ورثہ نانہہ محفوظ رکھن تے اس ور فخر غی دلچسپی نانہہ پیدا کرنو ہے۔

CS RAS

چیف سیکریٹری اتل ڈلو نے پچھلے تہارے تمام محکماں غا انتظامی سربراہاں تے ضلع ترقیاتی کمشنراں غی اک میٹنگ غی صدارت کرتاں واں زور پایو جے جموں کشمیر بحالی معاونت سکیم آر اے ایس غے تحت موصول درخواستاں غو فوری طور ور نمیڑاں نانہہ یقینی بنایو جائے۔ یہ سکیم 1994 آلا ایس آر او 43 غی لے گی۔ جناب ڈلو نے اس سکیم غے تحت آن آلی درخواستاں غی موجودہ صورتحال غو جائزو لیتاں واں متعلقہ محکمہ نانہہ ہدایت جا ری کی جے موجودہ قوانین غے مطابق میرٹ ور مبنی لسٹ بنا غے تقرری کریں۔ انہاں نے سال 2 ہزار 24/23/2022 غے دوران موصول ہوئی درخواستاں تے اس دوران پیدا ہوئی خالی آسامیاں غو جائزو لیو۔ انہاں نے عام انتظامی محکمہ نانہہ ہدایت جا ری کی جے خالی آسامیاں نانہہ شامل کر غے ناولاں توں ناولاں میرٹ لسٹ تیار کریں۔ انہاں نے ڈپٹی کمشنر ان نانہہ کہیو جے متعلقہ ضلع غا معاملہ غی خود نگرانی کریں تاکہ تحصیلداراں غے ذریعے کھٹ توں کھٹ ویلا مانہہ فراہم کی

جاسکیں۔ اس دوران دسیو گئیو جے ہُن تک پورٹل ور 1 ہزار 1 سو 16 معاملہ موصول ہوا
ہیں۔ جن وچوں 1 ہزار 60 درخواستاں نانہہ مزید کا روائی واسطے متعلقہ محکماں درٹور
دتو گئیو ہے۔

CS JK Samadhan

چیف سیکریٹری اتل ڈلو نے پچھلے تہاڑے تمام محکماں غا انتظامی سربراہاں تے ڈپٹی
کمشنراں سنگ اک میٹنگ منعقد کر غے محکمہ عوامی شکایات غے تحت آن آلا جے کے
سامدھان پورٹل ور عوام غی طرفوں درج کی گئی شکایات غی صورتحال غو جائزو لیو۔ جناب
ڈلو نے محکمہ نانہہ ہدایت جا ری کرتاں واں کہیو جے پورٹل واسطے اک مضبوط تے
تجزیاتی ڈیش بورڈ تیار کریں تا نجے عوام غی طرفوں درج کی گئی شکایات غی تفصیلات
فراہم ہو سکیں۔ اُنہاں نے محکمہ نانہہ کہیو جے اک مخصوص تکنیکی ٹیم تشکیل دیں جس
مانہہ دیگر اداراں غا ماہرین شامل ویں۔ تا نجے محکمہ تے شہریاں نانہہ پیش آن آلی تکنیکی
مسائل نانہہ جلد حل کیو جاسکے۔

یہ خبر تم آکاشوانی جموں تیں سُن رہیا ہیں خبراں غا باقی حصہ نال اظہر حسین۔

Millet Kathua

ڈپٹی کمشنر کٹھوعہ ڈاکٹر راکیش منہاس نے اج پتھوال کٹھوعہ مانہہ اک موٹا اناج بارے
ریستورینٹ غو باضابطہ طور ور افتتاح کیو ہے۔ جھیڑو جے ضلع غی جامع ذراعت غی
ترقی نانہہ فروغ دین غی کوششاں مانہہ اک اہم سنگ میل ہے۔ یوہ قدم مجموعی ذراعت
ترقیات پروگرام سال 25/2024 غو حصو ہے جس غو مقصد غذائی اناج مثلاً راگی اور
جوار غا استعمال غی حوصلہ افزائی کرنو ہے۔ جس نال صحت نانہہ بے شمار فائدہ حاصل
ویں۔ مہارا ضلع نمائندہ پردیپ شرما غے مطابق کرشنا میلت ریستورینٹ جھیڑو جے اک
کالسری نے اپنی مدد آپ گروپ غے ذریعے شروع کیو ہے تے تمام عمر غا لوکاں نانہہ موٹا
اناج غی غذائی فوائد غا تجربہ کرن غو اک منفرد موقعو فراہم کرے۔ ڈاکٹر منہاس نے اپنی
مدد آپ گروپ نانہہ اُن غا اقدام ور مبارکباد دتی اور باقیوں ور زور پایو کہ وے موٹا اناج غا
فروغ واسطے تعاون کریں اور پائیدار ذراعت غا طریقاں غے ذریعے صحت مند زندگی
نانہہ فروغ دین غی اہمیت ور زور دتو۔

JKAEDA Muft Bijli

صارفین نانہہ پی ایم سورہ گھر مفت بجلی غے تحت سبسڈی غی سہولت توں فائدو لین غی
ترغیب دیتاں واں جموں کشمیر توانائی ترقیات ایجنسی چھتاں ور سولر پینل لان اور بجلی غا
پہاڑی بلاں توں چھٹکارو دوان واسطے آمادہ کر رہی ہے۔ آکاشوانی جموں غا نمائندہ نے دسیو
ہے کہ جموں کشمیر توانائی ترقیات ایجنسی پائیدار ترقی، توانائی تک رسائی، توانائی غی
حفاظت، اقتصادی ترقی اور خوشحالی غا حصول مانہہ پن بجلی، شمسی ہوا اور ہائڈروجن
توانائی سمیت قابل تجدید توانائی غی تمام اقسام نانہہ وسیع پیمانہ ور اپنان اور پائیدار استعمال
نانہہ اُجاگر کرے۔ جموں بجلی تقسیم کا رپو ریشن لمیٹڈ نے گھریلو صارفین توں اپیل کی ہے
کہ وے پی ایم سورہ گھر غے تحت گرڈ توں منسلک چھت آلا سولر پلانٹس نانہہ استعمال
مانہہ آئیں اور بجلی غا پہاری بلاں توں بچن واسطے مفت بجلی یوجنا توں فائدو حاصل
کریں۔

Railway GSV

ریلوے غا مرکزی وزیر اشونی ویشنو نے دعوه کیو ہے جے گتی شکتی ویشو ویدیالیہ وزیر اعظم نریندرمودی غا نظریہ سنگ دُنیا تے مُلک غی سب توں بہترین یونیورسٹی غا طور ور با ندے آوے گی۔ پچھلے تہاڑے نوی دہلی مانہہ گتی شکتی ادارہ غی پہلی میٹنگ غی صدارت کرتاں واں جناب ویشنو نے کہیو جے یوہ ادارو بکھ بکھ شعباں بشمول ریلوے، شاہراں، دفاع تے دیگر مانہہ روزگار پیدا کرن آلا کورساں ور توجہ مرکوز کرے گو۔ وزیر ریلوے غو کہنو تھو جے بھارتی ریلوے منیجمنٹ مانہہ خدمات دین مانہہ نواں افسر گتی شکتی ویشو ویدیالیہ غی طرفوں تیار کی گتی تربیت نانہہ حاصل کریں گا۔ اُن غو مزید کہنو تھو جے یاہ تربیت مرکزی تربیتی تے صنعتی اداراں مانہہ عملی تجربات ور مبنی وے گی۔ جس مانہہ جی ایس وی غی طرفوں کاروباری منیجمنٹ غی ماسٹر ڈگری وی دتی جائے گی۔

Rail Kashmir

مرکزی وزیر مملکت برائے ریلوے رونیت سنگھ نے کہیو ہے جے جنوری 2025 غا پہلا ہفتہ مانہہ دہلی تیں کشمیر بشکار ریل خدمات بحال ہو جائے گی۔ اُنہاں نے اس گل غو اظہار ریاسی مانہہ کٹڑا ریاسی ریل رستہ ور چل رہیا کم غا جائزہ غے دوران کیو۔ قابل ذکر ہے جے ریلوے غی طرفوں کشمیر توں ریاسی تک کا میاب آزمائشی سفر نانہہ پہلاں ہی مکمل کر لیا گیا ہے۔ تے تقریباً 20 کلو میٹر غا رستہ ور کم اجوں جاری ہے جس نانہہ دسمبر 2024 مانہہ پورو کر لیا جائے گو۔ مہارا ضلع غا نمائندہ دیندر ٹھاکر سنگ گل کرتاں واں مرکزی وزیر مملکت برائے ریلوے رونیت سنگھ نے اس طرح کہیو۔ بائٹ۔۔

اس غے نال ہی خبراں غو یوہ بلیٹن ختم ہوؤ۔